

Na osnovu člana 44. stav 2. i člana 58. stav 2. Zakona o upravljanju otpadom ("Službene novine Federacije BiH", broj 33/03), Vlada Federacije Bosne i Hercegovine, na svojoj 116. sjednici održanoj 30. juna 2005. godine, donosi

UREDBU

O FINANSIJSKIM GARANCIJAMA KOJIMA SE MOŽE OSIGURATI PREKOGRANIČNI PROMET OTPADA

Član 1.

Ovom uredbom utvrđuju se vrste i sadržaj finansijskih garancija kojima se može osigurati prekogranični promet otpada.

Član 2.

Izrazi koji se koriste u ovoj uredbi imaju slijedeća značenja:

Država izvoznica - Bosna i Hercegovina,

Država uvoznica - država potpisnica Bazelske konvencije, u koju je planiran prekogranični promet opasnog otpada ili drugih vrsta otpada, u svrhu odlaganja u toj državi.

Tranzitna država - država potpisnica Bazelske konvencije, osim države izvoznice ili uvoznice, kroz koju je planiran promet opasnog otpada ili drugih vrsta otpada.

Zainteresirane države - države koje su izvoznice, uvoznice ih tranzitne države, bez obzira da li su potpisnice Bazelske konvencije.

Izvoznik - osoba pod jurisdikcijom države izvoznice koja organizira izvoz opasnog otpada ili drugih vrsta otpada.

Uvoznik - osoba pod jurisdikcijom države uvoznice koja organizira uvoz opasnog otpada ili drugih vrsta otpada.

Nadležni organ - Federalno ministarstvo prostornog uređenja i okoliša.

Prevoznik - osoba koja obavlja prevoz opasnog otpada ili drugih vrsta otpada.

Prekogranični promet - promet opasnog otpada ili drugih vrsta otpada s područja pod nacionalnom jurisdikcijom jedne države na ili kroz područje pod jurisdikcijom druge države ili na ili kroz područje koje nije pod nacionalnom jurisdikcijom niti jedne države, pod uvjetom da su u promet uključene barem dvije države.

Zbrinjavanje opasnog ili drugih vrsta otpada ne štetno po okolinu - poduzimanje svih praktičnih koraka da bi se osiguralo da se opasni otpad ili druge vrste otpada zbrinjavaju tako da se zaštiti ljudsko zdravlje i okolina od štetnog djelovanja takvog otpada.

Nezakonit promet - prekogranični promet opasnog otpada ili drugih vrsta otpada prema članu 9. Bazelske konvencije.

Rizik odbijanja - podrazumijeva da ako iz bilo kojih razloga Odlagač ne može izvršiti odlaganje otpada na način koji nije štetan po okolinu, finansijska garancija mora pokriti troškove njegovog povrata vlasniku otpada.

Član 3.

Finansijska garancija kojom se može osigurati prekogranični promet opasnog ili drugih vrsta otpada (u daljnjem tekstu: otpad) može biti polisa osiguranja ili finansijska garancija banke.

Polisom osiguranja ili finansijskom garancijom banke ne osigurava se sam prijevoz opasnog otpada koji mora biti pokriven drugim odgovarajućim osiguranjem prema propisima o prijevozu opasnih tvari.

Član 4.

Finansijsko osiguranje prekograničnog prometa otpada može se izvršiti finansijskom garancijom banke ili polisom osiguranja ovlaštenog osiguravajućeg društva u skladu sa zahtjevima zemlje uvoznice ili zemlje tranzita.

Finansijska garancija banke ili polisa osiguranja pokriva visinu sredstava potrebnih za slučaj kada otpad koji je stigao na odredište iz bilo kojih razloga nije moguće obraditi bez opasnosti po okoliš, te ga je potrebno prevesti u neko drugo postrojenje u odgovarajućim uvjetima ili vratiti natrag izvozniku/ proizvođaču.

Član 5.

Finansijska garancija banke ili polisa osiguranja sadrži najmanje slijedeće podatke:

- 1) o izdavaocu finansijske garancije ili polise osiguranja,
- 2) osobe koja sklapa osiguranje,
- 3) broj osiguranja ili polise,
- 4) o primaocu opasnog otpada u zemlji uvoznici (sa istim podacima kao u zahtjevu za izdavanje izvozne saglasnosti),
- 5) o otpadu (vrste i količine) koji je predmet prekograničnog prometa,
- 6) visina osiguranja,
- 7) početni datum osiguranja,
- 8) krajnji datum osiguranja (koji mora biti najmanje 90 dana duži od dana posljednjeg transporta po konkretnom osiguranju),
- 9) nadležni organ koji izdaje saglasnost za izvoz otpada i koji je korisnik osiguranja i
- 10) uvjete osiguranja dogovorene između izvoznika i davaoca garancije ili polise osiguranja.

Član 6.

Procjenu novčanih sredstava na koje glasi finansijska garancija banke ili polisa osiguranja za pokrivanje svih rizika uključivo i rizik odbijanja vrši izvoznik uz saglasnost uvoznika otpada.

Procjenu novčanih sredstava iz stava 1. ovog člana ovjerava nadležni organ.

Osnovicu za procjenu novčanih sredstava potrebnih za osiguranje prekograničnog prometa otpada čini iznos potreban da se sav otpad koji je predmet ugovora obradi bez opasnosti po okoliš.

Član 7.

Odlagač otpada, nakon izvršenja ugovorene obaveze odlaganja otpada na način koji nije štetan po okolinu, izdaje potvrdu izvozniku i nadležnom organu.

Potvrda iz stava 1. ovog člana predstavlja osnov za oslobađanje od obaveza po finansijskoj garanciji banke ili polisi osiguranja.

Član 8.

U slučaju prekograničnog prometa otpada, koji će se zbrinjavati u više prekograničnih pošiljki osiguranje se može pokriti općom finansijskom garancijom ili općom polisom osiguranja koja pokriva cjelokupne količine opasnog otpada koji će biti zbrinut u zemlji uvoznici.

Opća finansijska garancija ili opća polisa osiguranja glasi na ukupni novčani iznos za sve štete koje mogu proizaći pri ukupnom prekograničnom prometu otpada.

Član 9.

Ova Uredba stupa na snagu osmog dana od dana objavljivanja u "Službenim novinama Federacije BiH".

V broj 322/05
30. juna 2005. godine
Sarajevo

Premijer
dr. Ahmet Hadžipašić, s.r.